

# O Le Fale Seevae o Abuelo

Saunia e Ray Goldrup  
E faavae i se tala moni

“*Ou te faamalie atu’ e le faigofie ona fai atu*”  
(Children’s Songbook, 98).

Sa tatala e Mikueli le faitotoa i le fale seevae o lona Abuelo (lona tamamatua). Sa ia sosogiina le pa’u sa galue ai Abuelo. O se tasi o manogi e ese le fiafia i ai.

“Malo, Abuelo!”

Sa tootuli Abuelo ma tusi le vae o se tagata faatau i luga o se fasi pepa. Sa le’i ea a’e o ia i luga. Sa lei lelei tele le faalogo a Abuelo.

Sa nofo ifo i lalo Mikueli i se nofoa umi. Sa ia tilotilo atu i le faaputuga o pa’u ua uma ona tatipi. Sa ia taumanatunatu i mea o le a faia e Abuelo i pa’u taitasi, e faaoga ai lana samala ma le palaea.

Sa faamanatu atu e meafaigaluega ia Mikueli se isi mea sa ia fiafia i ai. E masani ona tuu atu e Abuelo ia te ia se lole pe a fesoasoani Mikueli e faamama le fale.

Ae o lea ua fiafia nei Mikueli! Sa ia iloa e le tatau ona ia avea se lole e aunoa ma le fesili, ae sa foliga mai o le a pisi Abuelo mo se taimi. “Atonu ou te le tau faatali,” o mafaufauga ia o Mikueli.

Sa aapa ifo Mikueli i lalo o le fata mo le fagu lole. Sa tumu i lole e fiafia i ai—e suamalie ma feu i le pauta feu! A o ia tatalaina, sa fai si le mautonu o Mikueli. Ae sa matua foliga manaia mai le lole. Sa ia faatopetope ma tuu i lona gutu.

E lei leva ae alu le tagata faatau. Sa piki e Abuelo se fasi pa’u ma lolo i totonu o ni vai. Sa fesoasoani e faavaivai ai le pa’u ma faigofie ai ona faaoga.

“*E te iloa oe, e tatau  
ona tatou faapei  
atili o le seevae lea,  
o le tala lea a  
Tamamatua.*”



Sa folopatato e Mikueli le mea na totoe o le lole i le vave sa ia mafaia. Ona ia savali atu lea ia Abuelo.

“Talofa!” Sa fai atu ai Abuelo ma ataata. “Ua ou fiafia lava ua e sau e vaai au.”

Sa fusi atu e Mikueli ia Abuelo. Sa ia faamoemoe e lei mafai ona iloa e Abuelo sa ia ‘aia se fasi lole. Sa tulei ese e Mikueli lea popole.

“E foliga mai ua e pisi i le aso,” o le tala lea a Mikueli, ma tusi lona lima i le faaputuga pa’u. “E te manaomia se fesoasoani?”

“Ioe! E mafai ona e pasi maia le filo lena?”

Sa aapa atu Mikeuli i se fasi filo umi. Sa ia suluina i le va o ona lima. Sa malo nai lo lona foliga mai.

“Oka, ta’i malosi tele.”

Sa ataata Abuelo. “E tatau ona malo, ia umi se taimi e faaoga ai.” Sa tosoina e Abuelo le filo i le pa’u. Ona i ai lea i ona foliga le pupula lea e faaigoa i nisi taimi e Mama o le vaai “Poto a Abuelo”.

“E te iloa oe, e tatau ona tatou faapei atili o le seevae lea,” o le tala lea a Abuelo a o lue atu lona ulu.

Sa faapuiti atu le vaai a Mikueli i le pa’u. “Um. E tatau?”

“Ioe, e sa’o. E tatau ona tumau lo tatou malolosi. O lena mea o le a le mafai ai e faaososoga a Satani ona tatou pauu ese ai.”

Sa emo mai le lole mumu i le mafaufau o Mikueli. Sa ia iloa e tatau ona ia ta’uina ia Abuelo.

Sa aveese mai e Abuelo se seevae tuai mai le fata. “Vaai i le pu tele lea?”

Atonu sa mafai ona ofi lelei ai le lima o Mikueli i le pu. “Ioe.”

“Sa laititi lava le pu lea, ma semanu e faigofie ona toe fai. Ae sa latou faatalitali, ia lea la o le a sili ona faigata ona toe fai. O mausa leaga ma filifiliga leaga e faapei

o le pu lena. E sili le vave faaleleia.”

Sa toe lue atu le ulu o Abuelo, ma sa liua le vaai Poto a Abuelo i se ataata. Sa faaauau pea ona la talanoa a o galue ia Abuelo. O le taimi atoa, sa mafaufau ai pea Mikueli i le lole laau mumu.

Ina ua uma galuega a Abuelo, sa fesoasoani Mikueli ia te ia e faamama.

Ona aapa atu lea o Abuelo i lana fagu lole.

Na iu ina le mafai e Mikueli ona toe taofiofi. “Sa ou aveina se tasi o au lole!” na masua atu ai.

Sa tuu e Abuelo le fagu i lalo. “O le a lau tala?”

Sa ta’u atu e Mikueli ia te ia e uiga i le aveina o le lole e aunoa ma le fesili. “Ou te matua faamalie atu, Abuelo! Ou te le toe faia lava, ou te folafola atu!”

Sa tuu atu e Abuelo ia Mikueli se opo lapo’a. Sa matua lelei lagona o Mikueli.

“Faafetai atu i lou faamaoni. E sili ona taua lena ia te au nai lo se isi lava mea.”

I le savaliga i le fale, sa lagona e Mikueli ua pei lava o ia o se tasi o pea seevae fou a Abuelo Malosi i le mea e gata ai, ma ua saunia mo le olaga! ■

*E alala le tusitala i Iuta, ISA.*



## O SE LAGONA LELEI

I se tasi aso na ma o ai ma lo’u tina e totogi lana pili o le vai, ma o le tamaloa sa i o ma luma sa toulu ni ana tupe se tele ae na te lei iloaia. Sa ou faanatinati ma toe avatu ia te ia. Sa ia fai mai, “Faafetai tele lava” ma sa fai mai na te lei manatu e i ai lava se isi tamaitiiti na te faia lena mea. Sa ou maua se lagona lelei tele ina ua uma lena mea. O le a ou manatuaina pea lena lagona lelei.

**Brianna C., 9 tausaga, Idaho, ISA**

